

■ COLUMNA

Cun corns

DA BERNARD CATHOMAS

Dapi lezza giada ad alp ch'ina mugia aveva rut giu ina corna e sanguinava talmain che nus avain stuì liar si ina faschadira grossa, dapi lura sai jau ch'ìls corns da vatgas e chauras èn materia viva cun avainas da sang. Probabel è quella experientscha er la raschun che jau hai cumpassiun cun vatgas senza corna, er sch'ìls motivs per scornar èn da princip chapibels: en ina stalla libra san corns chaschunar blesuras, surtut sch'ìls animals ston star da stretg.

Uss ha il pievel da decider sche purs che tegnvan vatgas cun corns duain retschaiver contribuziuns spezialas. Quai pretenda in' iniziativa populara dad *Armin Capaul* che ha rimnà passa 150 000 sutscrizziuns quasi persul, sco ils ins pretendan. Auters din che la gruppia dubiusa dal Parlament da las Alps haja gidà decisivamain ad arrivar sin quest resultat, e perquai saja l' iniziativa da refusar. Capaul na snega betg il sustegn da questa vart, ma el haja acceptà quel senza malart, sulettmain a favur da sia iniziativa e per nagut auter. Ad el crain ins quai.



Armin Capaul n'ha betg mo in num sursilvan, el ha er vivì en Surselva ils emprims onns da sia vita ils 1950. Las scolas ha el fatg a Turitg nua ch'el ha er inhalà l'aria dals 1968 e dals hippis; enturn 1980 steva el a Cuira e dapi onns maina el cun sia famiglia in bain puril ecologic en il Giura bernais, cun vatgas cun corna e nums feminins sco quai era – ed è probabel anc adina – usit er tar nus. El è in um cun empatia per tuttas creatiras – sco sogn Francestg d'Assisi – al qual el regorda cun sia cumparsa e ses carisma.

Cun sia iniziativa è Capaul daventà in star da las medias, ma ha er provocà emeziuns, beffas, risadas e nuschadads. Encunter tuttas resistenzas ha el fatg

sia via. Avant in pèr emnas ha il cussegl federal preschentà la missiva che propona a las chombras federalas da refusar l' iniziativa. Per l'ina existian gia leschas federalas che possibilitassan er da promover la tratg dad animals cun corna ed ina producciun favuravla a l' animal; per l' altra duai mintga pur sez pudair decider sch'el vul vatgas cun u senza corns – ed er valitar sez il privel d' accidents. Ins tema er che las vatgas cun corna vegnissan la finala puspè rentadas vid la chadaina, e gliez fiss in pass enavos.

Ins astga supponer che l' iniziant ha spetgà ina tala resposta dals politichers e birolists da Berna. Ussa quint' el cun il pievel, surtut cun las dunnas, sco el di insanua. Er sch' il pievel di a la fin forsa na, Armin Capaul ha gia uss guadagnà.

Quai che fascinescha vid quest' istorgia: tge ch' in singul sa metter en moviment e cuntanscher sch' el è persuadì ed abel da persuader auters, sch' el s' engascha cun chau, cor e maun e sch' el na lascha starmentar. Nossa societad dovra Armins Capaul.